

ეთიკის კომისიის
გ ა დ ა წ ყ ვ ე ტ ი ლ ე ბ ა
დისციპლინური წარმოების შეწყვეტის თაობაზე

მეთხე დისციპლინური კოლეგიის შემადგენლობა:

ციცინო ცხვედიანი - კოლეგიის თავმჯდომარე

გოჩა სვანიძე - კოლეგიის წევრი

თორნიკე ბაქრაძე - კოლეგიის წევრი

საჩივრის ავტორი - ნ. კ.

საჩივრის კომისიაში შემოსვლის თარიღი: 31.01.2014

საჩივრის რეგისტრაციის ნომერი: 010/14

საჩივარი შეტანილია: ადვოკატ მ. ბ.-ს მიმართ /სიითი №----/

საჩივრის მოთხოვნა: ადვოკატ მ. ბ.-სთვის „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულებით გათვალისწინებული პასუხისმგებლობის დაკისრება

I აღწერლობითი ნაწილი

1. საჩივრის ავტორის პოზიცია:

- 1.1 2014 წლის 31 იანვარს ს.ს.ი.პ. „საქართველოს ადვოკატთა ასოციაციის“ ეთიკის კომისიას საჩივრით მომართა ადვოკატმა ნ. კ.-მ და მოითხოვა ადვოკატ მ. ბ.-სთვის დისციპლინური პასუხისმგებლობის დაკისრება.
- 1.2 საჩივრის ავტორის განცხადებით, იგი სისხლის სამართლის საქმეზე ბრალდებულ დ. პ.-ის ინტერესებს იცავდა. 2013 წლის 04 ნოემბერს მასთან საადვოკატო ბიუროში ადვოკატი მ. ბ. მივიდა. საჩივრის ავტორის განცხადებით, მ. ბ.-მ იგი მოატყუა და უთხრა, რომ ბრალდებულ დ. პ.-ის საქმეზე თავად დაზარალებულ კ. ფ.-ს ინტერესებს წარმოადგენდა.
- 1.3 საჩივრის ავტორის განმარტებით, მ. ბ. მასზე ფსიქოლოგიურ ზეწოლას ახორციელებდა იმ მიზნით, რომ დაზარალებულისთვის 5 000 (ხუთი ათასი) ლარის გადახდაზე დაეთანხმებინა. საჩივრის ავტორის განმარტებით, მან მ. ბ.-ს განუცხადა, რომ მკურნალობის ხარჯებს 2 200 (ორი ათას ორასი) ლარის ოდენობით სრულად გადაიხდიდნენ, ხოლო სხვა ხარჯების

ასანაზღაურებლად მტკიცებულების სახით შესაბამისი ხარჯთაღრიცხვა წარედგინა დაზარალებულის ოჯახს.

- 1.4 საჩივრის ავტორის განმარტებით, მისმა პოზიციამ მ. ბ. გააზრა და მან საჩივრის ავტორს მოწმე გ. ბ.-ის დანაბარები გადასცა. გ. ბ. ყოფილი პროკურორი იყო და ნ. კ.-ს სერიოზული პრობლემების შექმნით ემუქრებოდა. საჩივრის ავტორის განცხადებით, მ. ბ.-მ მას განუცხადა, რომ 5 000 (ხუთი ათასი) ლარის ნებაყოფლობით გადაუხდელობის შემთხვევაში ბრალდებულს 10 000 (ათი ათასი) ლარის გადახდა მოუწევდა.
- 1.5 საჩივრის ავტორის განცხადებით, მ. ბ. არ იყო დაზარალებულ კ. ფ.-ს ადვოკატი, რაც გამომძიებლის მიერ საჩივრის ავტორისათვის გადაცემული სისხლის სამართლის მასალებითაც დასტურდება.
- 1.6 საჩივრის ავტორის განმარტებით, მ. ბ.-მა მის მიმართ უპატივცემულობა და არაკოლეგიალობა გამოიჩინა. მისი მხრიდან ფსიქოლოგიური ზეწოლა ხორციელდებოდა, რათა საჩივრის ავტორს საკუთარი კლიენტის ინტერესების წინააღმდეგ ემოქმედა, რაც აკრძალულია როგორც „ადვოკატთა შესახებ“ საქართველოს კანონით, ასევე ადვოკატთა ეთიკის კოდექსით.
- 1.7 2014 წლის 04 მარტს საჩივრის ავტორმა ეთიკის კომისიის საპროცესო კოლეგიის სხდომაზე განაცხადა, რომ ადვოკატ მ. ბ.-ს მიმართ პრეტენზია აღარ აქვს და უარს ამბობს წარდგენილ საჩივარზე.

2. ადვოკატის პოზიცია:

- 2.1 2014 წლის 06 თებერვალს ადვოკატმა მ. ბ.-მ ეთიკის კომისიას წარუდგინა ახსნა-განმარტება და მიუთითა, რომ ადვოკატ ნ. კ.-ის ბრალდებები არის უსაფუძვლო და შეურაცხმყოფელი. ადვოკატის განმარტებით, დაზარალებულ კ. ფ.-ს მეგობრის - გ. ბ.-ის თხოვნით მას დაზარალებულის ინტერესები სამოქალაქო კუთხით უნდა დაეცვა. მხარეები რწმუნებულების გაცემაზეც შეთანხმდნენ, თუმცა მანამდე ადვოკატს საქმის მსვლელობის ეტაპი უნდა გაერკვია და სწორედ ამ მიზნით მივიდა ოფისში ნ. კ.-სთან, რომელიც ამ საქმეში ბრალდებულ დ. პ.-ის ინტერესებს იცავდა.
- 2.2 ადვოკატის განცხადებით, ნ. კ.-ის ოფისში არა საკუთარი ინიციატივით, არამედ დაზარალებულ კ. ფ.-ს თხოვნით მივიდა. იმ პერიოდში კ. ფ. მოწმის სახით არც იყო დაკითხული. მას, როგორც ადვოკატს, ჰქონდა უფლება დაეცვა მისი პოტენციური კლიენტის ინტერესები.
- 2.3 ადვოკატის განმარტებით, მან ნ. კ.-ს ჰკითხა საქმის მსვლელობის შესახებ და აღნიშნულ საქმეში სამოქალაქო კუთხით მისი სავარაუდო ჩართვის შესახებაც მიაწოდა ინფორმაცია, რასაც ნ. კ.-ის მხრიდან აგრესია და მოწმე გ. ბ.-ის ლანძღვა მოჰყვა პასუხად. ნ. კ.-ის არაკვალიფიციური და არაკოლეგიალური ქმედების შემდეგ მან ნ. კ.-ის ოფისი დატოვა.
- 2.4 ადვოკატის განცხადებით, ადვოკატ ნ. კ.-ს პირადი დაპირისპირება ჰქონდა მოწმე გ. ბ.-სთან და 2014 წლის 30 იანვარს გორის რაიონულ სასამართლოს ფოიეში ადვოკატისთვის შეუფერებელი ქმედებით პროვოკაციაც მოუწყო მოწმე გ. ბ.-ს.

2.5 ადვოკატის განმარტებით, მის მიერ ნ. კ.-ზე ფსიქოლოგიური ზეწოლის მოხდენის ფაქტი არ შეესაბამება სიმართლეს და ვერც მის მიერ წარდგენილი მტიცებულებები შეუწყობენ ხელს საქმის გარემოებების გარკვევას. შესაბამისად, ნ. კ.-ის საჩივარი ეთიკის კომისიის მიერ არ უნდა იქნეს განხილული.

3. მოწმე კ. ფ.:

- 3.1 მოწმის წერილობითი ახსნა-განმარტების მიხედვით, ნ. კ.-ის საჩივარი ადვოკატ მ. ბ.-ს მიმართ არის უსაფუძვლო. იგი იყო დაზარალებული და რადგან ჯანმრთელობის მდგომარეობის გამო თავად ვერ ახერხებდა ადვოკატის აყვანას, ამიტომ თავის მეგობარს - გ. ბ.-ს სთხოვა ადვოკატ მ. ბ.-სთან დაკავშირება.
- 3.2 მოწმის განმარტებით, იგი ადვოკატს ტელეფონით ესაუბრა და ნოტარიალურად დამოწმებული მინდობილობის გაცემაზეც შეუთანხმდა. ამავდროულად მ. ბ.-ს სთხოვა, რომ ბრალდებულ დ. პ.-ის ადვოკატ ნ. კ.-სთან მისულიყო და საქმის მიმდინარეობის შესახებ მიეღო ინფორმაცია.
- 3.3 მოწმის განცხადებით, მან მალევე შეიტყო, რომ ადვოკატ ნ. კ.-სთან კომუნიკაცია არ შედგა. მოწმის განმარტებით, იგი ადასტურებს, რომ მისი ინტერსების დაცვა მიანდო ადვოკატ მ. ბ.-ს და ადვოკატი უფლებამოსილი იყო მის საქმესთან დაკავშირებით ეწარმოებინა მოლაპარაკება და დაინტერესებულიყო საქმის მსვლელობით.

II სამოტივაციო ნაწილი

4. ფორმალური წინაპირობების შემოწმება:

- 4.1 ადვოკატი მ. ბ. არის ს.ს.ი.პ. „საქართველოს ადვოკატთა ასოციაციის“ წევრი /სიითი №----/, საერთო სპეციალიზაციის. ადვოკატის ს.ს.ი.პ. „საქართველოს ადვოკატთა ასოციაციის“ წევრობა არ არის შეჩერებული, ასევე ის არ არის გარიცხული ს.ს.ი.პ. „საქართველოს ადვოკატთა ასოციაციიდან.“
- 4.2 ნ. კ.-მ ეთიკის კომისიას საჩივრით მომართა 2014 წლის 31 იანვარს.
- 4.3 სადავო ქმედება განხორციელდა 2013 წლის ნოემბერში. „ადვოკატთა შესახებ“ საქართველოს კანონის 32-ე მუხლის მე-2 პუნქტის საფუძველზე არ არის გასული დისციპლინური დევნის აღძვრისათვის დადგენილი ხანდაზმულობის ვადა - 5 წელი.

5. შემაჯამებელი დასკვნა:

ეთიკის კომისიას მიაჩნია, რომ ადვოკატ მ. ბ.-ს მიმართ „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულების 32-ე მუხლის თანახმად უნდა შეწყდეს დისციპლინური წარმოება.

6. სამართლებრივი შეფასება:

- 6.1 „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულების 32-ე მუხლის თანახმად: „საპროცესო კოლეგია შეწყვეტს საქმის წარმოებას დებულებით გათვალისწინებული საფუძვლებით, ასევე იმ შემთხვევაშიც, თუ განმცხადებელი ან პირი, ვისი მომართვის საფუძველზეც დაიწყო დისციპლინური წარმოება, უარს იტყვის საჩივარზე.“
- 6.2 საჩივრის ავტორმა 2014 წლის 04 მარტს ეთიკის კომისიის საპროცესო კოლეგიის სხდომაზე განაცხადა, რომ უარს ამბობს საჩივარზე მ. ბ.-ს მიმართ.

III სარეზოლუციო ნაწილი

ეთიკის კომისიამ იხელმძღვანელა „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულების მე-4 მუხლის მე-5-6 პუნქტებით, მე-19, მე-20 მუხლებით, 31-ე მუხლით, 32-ე მუხლით, მე-40 მუხლის პირველი პუნქტით და გადაწყვიტა:

1. დისციპლინურ საქმეზე №010/14 ადვოკატ მ. ბ.-ს მიმართ /სიითი №---/ შეწყდეს დისციპლინური წარმოება.
2. გადაწყვეტილების ასლი გაეგზავნოს მხარეებს.
3. საპროცესო კოლეგიის გადაწყვეტილება არ საჩივრდება.

კოლეგიის თავმჯდომარე:

/ციცინო ცხვედიანი/

კოლეგიის წევრი:

/გოჩა სვანიძე/

კოლეგიის წევრი:

/თორნიკე ბაქრაძე/